



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Quinton de Kock ODI nung
tanaben asayashi tenzüksü

Denuclearisation akhangba anenra
US den sensaksemtsü mulunga lir: Kim



VOL. XXII ISSUE NO. 340 (ADOK 340)

DIMAPUR

SANGTENNÜ (TUESDAY)

RONGJUI (SEPTEMBER) 23, 20: ₹ 5.00

Nagaland sorkari Job Reservation Commission tenteter

Dimapur, September 22, 2025 (TYO): Sorkar mapa nung Reservation Policy asadanga reprangtsü aser Nagaland nung aliba kin ajak asoshi policy tajungba kuma yanglushitsü atema Job Reservation Commission ka tentetogo.

Iba Commission ya Nagaland Governor ajanga tentet ta Commissioner & Secretary, Personnel and Administrative Reforms Department, Government of Nagaland, Mohammed Ali Shihab, IAS-i sangdong ka nung ashi.

Iba Commission-i Government records aser documents ajak reprangtsü aser Government official/Department mashii ka jaoka osang metetpelatsü tashi agütsür.

Job Reservation Commission-i Central aser tanga State Government balala indang Constitutional aser statutory provisions reprangdangtsü.

Parnokisa reservation atema criteria latettsü atema educational aser economic parameters reprangdangtsü.

Iba Commission-i Nagaland nung tang lateta aliba job Reservation Policy asadangtsü aser tongti kin hohotem, kaketshirtem, employees'

associations dena sendaktepa alirtem den asüngdangyatsü.

Parnokisa Government employment nung kin ka reservation asütsüba aser kin ka indang overall percentage atema tebilemba shidangtsü.

Commission-isa backward kin ka Government employment nung reservation asütsüba aser mapang telatet asadangtsü.

Commission-i ita trok tsüngda report agütsütsü aser parnok nem Home Department ajanga nungdakba office aser tanga teyaritem agütsütsü. Nungdakra tanga Department tem nungia teyari agütsü aser Finance Department-i senotsü amshitsü atema nungdakba budget lezmüksütsü.

Job Reservation Commission züngsemtem:

1. R Ramakrishnan. IAS (Rtd.) : Chairman
2. AHOd of Home Department/ Home Commissioner : Member
3. AHOd of Law & Justice Department : Member
4. AHOd of Higher and Technical Education Department: Member
5. AHOd of P&AR Department : Member Secretary

HITO-i Conrad Sangma dang CM melentepa inyaksü ajungshir

Shillong, September 22, 2025 (Agencies): Hynniewtrep Integrated Territorial Organisation (HITO)-i Meghalaya Chief Minister Conrad K. Sangma dang sorkar kümsük tom nung Khasi-Jaintia region nungi lennir ka nem Chief Minister inyakdaksütsü shiogo.

Meghayala nung tawa cabinet melenshidang Conrad-i 2023 nung zülutepa mali saka coalition partners tsüngda sorkar kümsük tesadang nung ministerial menden lemsateptsü tangatettep ka aliba indang kuli agütsüogo ta HITO-i ashi.

Ajisüaka, Meghalaya nung tetsürtemi senmangba loktiliba ka nung Dr. Ampareen Lyngdoh melenba ajanga cabinet nung tetsür ka danga mali kumogo ta parnokisa ashi.

Lenisüba nung ashishitep malitsü atema menden melentepba nung Chief Minister menden adentsüla. 1988 nung P.A. Sangma aser B.B. Lyngdoh

nati 50:50 power-sharing inyakyim mulungtep anungji Conrad-i lennir tajung ka ama tanüngba sorkar kümsük atema CM menden agütsütsüla ta HITO-i ayongzük.

"Constitutional menden tematiba pezüji- Chief Minister, Leader of Opposition, Speaker aser Deputy Speaker lir aser item ajak ya Garo nunger dang lir. Anungji kümsük tesadang ka ama Khasi-Jaintia region nungi Chief Minister inyaksüla" ta HITO-isa metetdaksü.

Parnokisa Deputy Chief Minister tem Prestone Tynsong aser Sniawbhalang Dhar, aser UDP tanishir Metbah Lyngdoh nunger ka nem Chief Minister inyakdaksütsü shidangogo.

Conrad-i tim tesü alitsü aser ajak adentsü indang jembia arur anungji Conrad-i nübu P.A. Sangma-i toktsüba senmang benshitsüla. 1998 lemtet tulu akhümtsüba bilemtetba ama iba ajanga nü lenisüba ajungkettsü ta HITO-isa ashi.

RMSA-2016 tesayurtemi anogo 11 lungkak aiter



Nagaland nung RMSA-2016 batch tesayurtemi scale pay aser regularization meshia tanü agi anogo 11 buba lungkak aitba noksa nung angur.

Kohima, September 22, 2025 (TYO): Nagaland nung RMSA-2016 batch tesayurtemi scale pay aser regularization meshia tanü agi anogo 11 buba lungkak aiter.

Sorkar school 133 nungi tesayur 367-i State Civil Secretariat kima nung lungkak aiter. Parnoki placards aser banners amer yimyim ayima temeten meshir.

2010 aser 2013 RMSA batch tesayurtem ama scale pay, regularization, aser state cadre nung induction süang ta tesayur 367-i takhangba agüja tan agi lungkak aitba shilem tanabuba agir.

Parnoki August 25 nungi pen-down strike ama

mezüngbuba lungkak aitba shilem agia liasü. High Court-i 2022 küm tetuyuba agüjaka state sorkari ibaji meinyaker aser kasa obendang ya taküm May ita Supreme Court-ia pusema nungitogo ta tesayurtemi ashir.

Sorkari parnok dang aremzüka atatsü mepishir. Iba ken o atema okadak review petition ka benoka lir ta sorkari ashir.

Sorkar aser tesayurtem tsüngda tekong merangtepba anentsü atema Department of School Education-i Nagaland RMSA Teachers Association (NRMSATA)-2016 züngsemtem dena luden ka tentettsü shidangogo saka tesayurtemi ibaji magizüker.

School Education and SCERT Advisor Kekhrielhoulie Yhome-i Hokolbarnü lungkak aitba tesem semdangogo aser tesayurtem dang mapa inyaksü ayongzüka liasü.

Tesayurtemi timtem ajurubatem agizüker saka sorkari ozüng dak sendakba maparen metembang tashi aremzüka atatsü mepishiba tashi angadaksür ta Advisor Yhome-i ashi. Ajisüaka tesayurtemi parnoki lungkak aitba anentsü memulunger.

"Onoki itasen aser service regularization akhangba ama mapa meinyak tashi lungkak aittsü" ta RMSA-2016 batch spokesperson Renbemo L. Patton-i ashi.

Dimapur nung drainage sadema lapoktsü

Dimapur, September 22, 2025 (TYO): Dimapur nung Drainage Encroachment Verification Committee (DEVK) ajanga bushitetba osang nung ajemdaker drainage noktanga aliba kiojentem raksatsütsü lemtetogo.

DEVK-i District Planning Development Board (DPDB) Chairman nem osang agütsüogo aser tekaraba nung tesemtem repranga senzüba sülen mapa inyaksü.

September 22, 2025 nü DPDB Dimapur senden nung Labour & Employment, Skill Development & Entrepreneurship, & Excise Department Advisor Moatoshi Longkumer-i district tajungba kümdaksütsü atema külemi yaritepa inyaka aotsü indang ashidang drainage khuret ya kanga rongdak tebilemstü ka lir ta ashi.

Pai Urban Development Department dang iba khuret atema mapa tenzüksü tetuyuba agütsü.

Taoba DPDB senden nung jembiba onüktem meyipa reprangshidang Dimapur DC Dr. Tinojongshi Chang-i Dimapur Airport, District Hospital, aser Railway Station dena public tesemtem nung ali atsünga agiba indang tebilemstü lemsatep.

Dimapur district telongtet nung drainage system atsünga agiba ken o tem jangjateptsü atema 2023 nung züngsem 10 agi akümba Committee ka tentet ta Dr. Chang-i ashi.

Iba Committee tali tashitaitba akümtsü atema züngsem tasen asem- Commissioner of Police, Dimapur, Naga Council Dimapur, aser East Dimapur Town Council Administrator anioktsü atema bangiemtepogo ta paisa metetdaksü.

Iba committee yagi Dimapur nung ali atsünga agiba indang comprehensive report ka renemtsü aser ibaji state sorkar nem agütsütsü mapa lezmüksütsüogo ta Dimapur DC-isa

ashi.

Külen, road sector ya Public Works Department aser Urban Development Department tsüngda lemsaogo ta paisa shisem.

Senden nung Dimapur Municipal Council Chief Executive Officer Thungchanbemo Tungoe-i September 27 nü "Run 4 Green Dimapur" alitsü osang metetdaksü. Iba sentong ya lipoküm kümzüka ayutsü osang prokshitsü atema ayonga agütsü ta pai ashi.

Dimapur District nung Nagaland Special Development Zone (NSDZ) mapa tenzüksü indang olemtepdang state sorkari agütsüba criteria indang jembia aser mapa tenzüka maodang state sorkar den tebilemba kar lemsateptsü lemtet.

September 22, 2025 nü DC Conference Hall, Dimapur nung DPDB senden ya MLA & Advisor Moatoshi Longkumer menden ser amen.

Charlie Kirk memorial service meraketa agiogo

New Delhi, September 22, 2025 (Agencies): September 21, 2025 nü Arizona kübok State Farm Stadium, Glendale nung asür Charlie Kirk atema memorial service ka ayongzüka agiogo.

Iba sentong ya asür Charlie Kirk'er Turning Point USA ajanga ayongzük aser US President Donald Trump-i o jembia tembanga liasü.

Iba sentong nung US sorkar ketdangsurtem aser conservative tanishirtemi o jembiba sülen US President Trump-i tatem nung o jembia.

Trump-i asür Charlie kinungtsü Erika Kirk dang pelaba metetdaksü aser Charlie Kirk nem "great American hero" jalokja jembia.

Charlie Kirk ya September 10,

2025 nü Utah Valley University nung sentong ka nung jembidang khaset. Iba lendong ataloker ghonda 33 tsüngda Charlie khaset ta tai tongloktür Tyler Robinson apu.

Charlie Kirk memorial service nung nisung meyrjang aika aden aser US President Donald Trump dak alia Vice President JD Vance, Secretary of State Marco Rubio, Pete Hegseth, Susie Wiles, Tucker

Carlson nunger den tangar aikati o jembia.

Charlie Kirk nem United States nung civilian honour tematiba Presidential Medal of Freedom agütsütsü ta Donald Trump-i metetdaksü. Turning Point USA tanishisang Charlie ya "great American hero" ka lir aser pa indang senmang mesamatsü ta Trump-isa ashi.

Charlie Kirk kinungtsü Erika-ia la kinungbo nem tetushi agüja jembia aser pa tepsetsang Tyler Robinson nem tatok agütsür ta ashi.

"Charlie atema onoki iba United States of America tajungtiba yanglushitsü. Charlie atema onoki atsioka malitsü, onok melapitsü aser mashileni maotsü" ta US Vice President JD Vance-i ashi.

Ranglok Tasen: AKTS Freshers' Day mungogo



Shillong nung Ao Kaketshir Telungjem nung 2025 kùm züngsem tasen purtem agizükba sentong nung agiba noksa ka yangi angur

Dimapur, Rongjui/Sept. 22 (TYO): Ao Kaketshir Telongjem, Shillong (AKTS) pur 63 buba Freshers' Meet sentong September 20, 2025 nü Naga Community Hall, Nongrim Hills, Shillong, Meghalaya nung agia liasü.

Iba sentong nung AKTS tir ajanga Aor kaketshirtem, kinunger aser temulunger tem den danga kin nungi tejaoker tem pelashishia agizüka liasü.

Pai kaketshirtem dang asüng jenjang melenshitsü asoshi shisaliok ya hadir ka ama amshitsü ayongzüik aser lokti asoshi mapa tajung inyaksü ajungshia liasü.

Iba sentong nung Angami

Students' Union Shillong ajanga sobaliba ken ka aten, Otsüla Longkongla otsü nung ajemdaker Süngken Süng saya ka agi lokti ayongzüikba den Nokinketer Band ajanga ken aten.

Iba sentong nung kaketshir tasen 59 tashi metetpelaba mapang agia liasü.

Tongti o jembiri kaketshirtem den jembidang, nenok ya asüng atema lenir masü tanü atema lenirtem lir, ta ashi.

Pai kaketshirtem dang 'consumers' nungi 'creators' akumtsü aser marks masü skills bushitsü ayongzüka liasü.

O jembiri technology kumdanga amshitsü aser pei takum nung AI (artificial

intelligence) kibur mekumdaktsütsü, mapa atema kisüng masü saka tarutsü lima asoshi renemtsü ayongzüik.

Süngo ajemba sülen Mr & Miss Fresher tetoktepba agiba nung kaketshir 14-i shilem agia liasü.

St. Edmund's College nungi Limaienla Pongen aser Shillong College nungi Khalong Kichu na Mr & Miss Fresher, AKTS 2025 shima liasü.

Iba sentong nung Jamir Sounds, Sadem Enterprise, Tir Yimyim, 4AM Productions, Fusion, Wedding Destination, Eastern Panorama, LAROS aser Alira nungeri yimya balala agi yaria liasü

Counter Terrorist Mock Exercise alitsü

Dimapur, Rongjui/Sept. 22 (TYO): National Security Guards (NSG) ajanga state stakeholders den külemi September 23 & 24, 2025 Dimapur districts kübok tesem kar nung Counter Terrorist (CT)

Mock Exercise agitsü, ta Commissioner of Police, Dimapur, Aotula T. Imchen, IPS sangdong ka ajanga ashi. Iba exercises agiba mapang anogotem Chümoukedima aser nüburtem maoksateptsü ayongzüiker, ta sangdong ajangasa ashi.

Mokokchung nung RI review workshop agi



Dimapur, Rongjui/Sept. 22 (TYO): Mokokchung district kübok Medical Officers, DPM, BPMs, DCM, BACs aser Urban Consultant atema district level Microplan review workshop ka September 22, 2025 nü CMO Conference Hall, Mokokchung nung agia liasü.

District nung Routine Immunization (RI) tashi itshitsü asoshi Health units ajunga nung Microplan aser communication plan timi renemtsü atema iba sentong ya ayongzüik.

Iba workshop ya Dr. M.A.M Azhar SMO (WHO) Mokokchung unit ajanga ketdangsüa agia liasü.

Tuli nung block level orientation sentong ayongzüik



Dimapur, Rongjui/Sept. 22 (TYO): Aadi Karmayogi Abhiyaan indang block Level Orientation sentong ka September 20, 2025 nü Mokokchung district kübok Dobashi Customary Court, Tuli nung ayongzüka liasü.

Aadi Karmayogi Abhiyaan ya linük tesem ajunga nung Ministry of Tribal Affairs, Government of India ajanga tenzüikba sentong ka lir, koba sentong yangluba nung shilem agiba aser department balala loktepba ajanga sorkar inyakyim aser services tem tribal areas nung nübur ajunga

nem agütsütsü nükjdong lir. Iba sentong nung Rural Development & NSLRM, PHED, Power, CHC Tuli, Food & Civil Supplies, Agriculture & Allied, Animal Husbandry & Veterinary Service aser PWD (R&B) densema sorkar indang department balala nungi shilem agia liasü.

Iba orientation sentong nung Tuli block kübok Wameken, Kangtsung, Merangkong, Asangma, Aopenzu, Luyong (Molungyimsen B) aser Molungyimsen nungia teshimtet nisungtem arua dena liasü.

EDTC ajanga Swachhata Hi Seva 2025 ayongzüksü

Dimapur, Rongjui/Sept. 22 (TYO): East Dimapur Town Council (EDTC) ajanga "Ek Din Ek Ghanta Ek Saath" omen nung ajemdaker Swachhata Hi Seva 2025 nüngtem nung lokti nübuttsük sentong ka ayongzüksü.

Iba sentong ya September 25, 2025 anepdang 6:00 ako nungi 8:00 ako tashi agitsü, anungji GBs, Chairmen, council

members, nüburtem aser commercial establishments ajunga dang amalitepa iba sentong nung shilem agitsü ayongzüiker, ta EDTC sangdong ajanga ashi.

East Dimapur temürekba aser tajungba kumdaktsüba nung nüburtemi shilem agia arok tebilemtsü südaktsütsü ajungmesoa aser libajen tajungba

kumdaktsütsü nükjdong nung iba sentong ya ayonger.

EDTC ajangasa commercial establishments ajunga dang iba nübuttsük mapang dokan tem shibanga ayutsü ayongzüiker, ta ashi.

Maneni EDTC ajanga nübur ajunga iba sentong nung shilem agitsü pelashishia jaoker, ta sangdong ajangasa ashi.

FAC nung International Day of Peace nüngtem nung sentong ka ayongzüik



Dimapur, Rongjui/Sept. 22 (TYO): Fazl Ali College, Mokokchung indang Department of Political Science ajanga Clark Center for Peace Research and Action (CCPRA) den lungiemer International Day of Peace bilemteta o jembiba sentong ka "Act Now for a Peaceful World" omen nung ajemdaker September 22, 2025 nü ayongzüka liasü.

Iba sentong tenzüka Dr. Benrithung, Associate Professor, Department of Political Science ajanga pela agizükba o jembiba aser sülen Dr. Toshitemjen, Associate Professor, Clark Theological College ajanga yimjung nüngdakba indang jembidang, yimjung ya jangratema kaa-ita aliba mesüra bongmang ka masü saka asangsang lir, koba

asenoki tangsa yangertsüla, ta ashi.

Yimjung makai terenlok malitsü, nisung meimchir akumtsübotep malitsü, tarutsü putu tesamar asütsü, ta pai ashi.

Pai Justice, Peace and Integrity of Creation (JPIC) tesendaktep indang rateta ashi aser yimjung yimsü ka adokdaktsütsü nüngdake ta ashi. Yimjing ya pasasa marutsü mesüra ataba ajanga marutsü, saka nisung shiai pei kidang, takum aser lokti nung shilem tilala agiba ajanga adokdaktsütsü, ta Dr. Toshitemjen-i ashi.

Tanü alima nung yimjung ya tebilemtsü balala ajanga amokmerener, aser yangji rara balala adoka aliba, takar aser sensaker tsüngta rongsenketzüng telemsa tulu aliba, tzü-mopung melenshiba,

rongsen mechi kati ka den toktepba, tamang samadakja digital nung osang tiazü prokshiba, mapa tamajung atema mashi lenmang nung tamangba yimsü amshiba dena lir, ta pai ashi.

Naga nungeri yimjung majangshiba ya kin telemsa, ochimashi, unemployment, maka-mait, pei agitsü kisüng jangraba, arok tangatetba samaa aoba ajanga lir, ta pai ashi.

Pai kaketshirtem dang sensaksemba aser social media ajanga, mapa agi, tamangba aser yimsü ajanga yimjung adokdaktsütsü ayongzüka liasü.

Iba sentong nung Fazl Ali College, People's College, Jubilee Memorial College aser Clark Theological College nungi kaketshirtem dena liasü.

ICDS Longleng ajanga 8th Poshan Maah tenzüik

Dimapur, Rongjui/Sept. 22 (TYO): Integrated Child Development Services (ICDS), Longleng ajanga September 22, 2025 nü CDPO Office, Longleng nung 8th Poshan Maah 2025 tenzüka liasü.

Sentong akhumdong EAC Longleng, Imkongnukla Ao ajanga district nung anema alitsü asoshi takum yimya tajung amshitsü tongtipang ta rateta ashi.

Ochiyongtsü tali chityongtiba indang jembidang, anogoshi chiyongtsü nung shini aser totzü ajema amshitsü lai ashi aser tanur asüdag nungi anepalutsü, anema aliba kibong yangertsü asoshi teburtem nem angatetdaktsütsü indang lai lemsatapa liasü.

Department of Social Welfare ajanga iba sentong ayongzüikba atema lai pelaba lemsatapa aser tetsütem aser

tanurtem ajungtsü asoshi maneni yaritepba asoshia tenüngsang agüja liasü.

Imkongnukla Ao-isa Anganwadi Workers tem dang maneni bendanga agütsür yariteptsü ayongzüka liasü.

Supervisor, L. Shamdok Menlei Phom ajanga iba sentong ayongzüikba nükjdong rasaa ashiba mapang Anganwadi Workers aser Helpers tem ajungmeso aser malnutrition samaja Poshan Maah 2025 takok angutsü asoshi rangloker inyaksü ajungshi.

District Coordinator, Poshan Maah, S. Longhong ajanga Poshan Maah 2025 takok anguba indang jembiba aser iba sentong kübok inyakyim balala rateta ashi. Sentong nung DPA, Poshan Maah, Y. Pauloi Phom menden liasü.



Mumbai, September 22, 2025: 'World Rose Day' anogomong nung Mumbai nung cancer agi shiranger tanurtem helicopter nung anir senzüba sülen tangokba noksa nung angur. 'Helicopter Joy Ride' sentong ya Cancer Patients Aid Association (CPAA) aser Pawan Hans Ltd. nati senteper ayongzük.

Bihar nung assembly election November 5-15 tsüngda agitsü

New Delhi, Rongjui/September 22 (Agencies): Bihar nung assembly elections November 5 nungi tenzuka November 15 tashi nung shilem asem lemsar agitsüa akok; October ita nung Election Commission of India-i iba election atema official sangdong agütsütsü.

Bihar election atema nüboyim tenzükogo. Assembly menden 243 aliba state nung Chhath Puja (October 28) sülen election shilem asem lemsar agitsü.

Election Commission-i Bihar election agitsü atema anogotemji October ita mezüngbuba hopta nung sangdongtsü.

Taruba hopta Chief Election Commissioner Gyanesh Kumar-i state yimtiba, Patna semdanga Bihar assembly election atema terenemshiba jenjang asadangtsü aser September 30 nü voters final list sangdongtsü.

Taküm Bihar nung electoral roll tasenba atema agiba Special Intensive Revision (SIR) agia draft roll nungi tenüng lakh 65 jungnüa agienba sülen mangatetep adoka liasü.

Congress-i aniba opposition INDIA teloktepi, election commission-i chichiba voters tenüng aika züngdokogo, ta aitsür.

Election nüboyim senden

balala nung jembidang RJD lenir Tejashwi Yadav-i, Bihar nung Mahagathbandhan teloktepi takok ngua sorkar akümtsü ta sangdonger.

Bihar election nung RJD aser Congress nati aniba Mahagathbandhan teloktep aser BJP o JDU nati aniba NDA teloktep na tsüngda sashia tokteptsü.

2020 küm Bihar assembly election-a shilem asem lemsar agi aser election agiba osangji November 10 nü sangdonga liasü. 2015 küm election bo shilem pongu tashi lemsar agia liasü; taküm-a shilem asem lemsar agitsü, ta osang angazüker.

PoK-i parnok sasa India den adentsü: Rajnath Singh



September 22, 2025 nü Rabat, Morocco nung Union Defence Minister, Rajnath Singh-i India nungertem den jembidang tangokba noksa nung angur.

New Delhi, September 22 (Agencies): Hombarnü Morocco nung India nungertem den jembidang Defence Minister Rajnath Singh-i, India-i tashi mamshiyonga Pakistan-occupied Kashmir (PoK)-i parnok sasa India den adentsü, kechiyong yangji aliba nüburtemi administration dang nungi nüchiso akhang tenzükogo, ta metetdaksü.

Rajnath Singh-i anogo ananü atema Morocco linük semdangba mapang Tata Advanced Systems manufacturing facility ka semzüksüogo.

India nunger defence minister kati tang mezüng Morocco semdang aser tang

mezüng Africa nung Indian defence manufacturing plant amenoker.

Morocco nung aliba sensotem den jembidang defence minister-i, "Pakistan occupied Kashmir (PoK) ya asenok meyong akümtsü. PoK nung nüburtemi takhangba agütsü tenzükogo. Parnoki yimyim ayimbaji nenokia angashir asütsüa akok," ta metetdaksü.

Küm pongu tejaklen Jammu & Kashmir nung sentong ka nung jembidanga pai kasa olen ya jembia liasü.

"Asenoki mamaktsü mesüra PoK atsünga magitsü, saka ibaji asenok meyong lir. PoK-i parnok sasa 'Onok-a India

nunger' ta ashitsü. Iba anogoji asenoki ajurutsü," ta pai ashi.

Operation Sindoor kübok anogo pongunü tashi raraba sülen Pakistan den yimjung agiba atema opposition party temi sorkar aitsüba dak sendakba nung pai iba olen ya jembia.

Pakistan den yimjung yangluba atema sorkar aija opposition party temi, Operation Sindoor mapang nung PoK agitsü maongka liasü saka Centre sorkari iba maongkaji magitet, ta aitsür.

Defence minister Singh-isa Defence tsütsü amalitepa inyaktsü atema Morocco den tezüngzüktep (MoU) ka agitsüa akok.

MULUNGZEN O



October 1924

September 2025

PHILIP 1:21
NI ASOSHI TAKÜM ALIBAJI KHRISTA, ASER TASÜTSÜJI
TAJANGZÜK

Ozü tsürabur arishir, **T. YIMYANGERLA** (101) Tsüremen yimtak nungi Dimapuri arua Chirnur aser Semchirtem den mapang tatsüka anisüngzüka munger; September 1, 2025 anepdang Iba akümüli toktsür KIBUBA den teti tepeladak alitsü ao. Asa-a taoi yipden nung alidang nungi asükhü anogo tashi onok den Kija, Kibong aser Lokti balalai mapang, nübo, rongsen aser tamang Sarasadem agi yaritepba Mulungzen O : Lai toktsür aoba Kinunger Semchirtem tashi agi nenok sobaliba mapa tajung mamatsü. Tsüngremi moajangma.

Alakteta Lokti aser Kija dang pelaba yamai shisemer:

- * Associate Pastor, H.Evan & members DABA.
- * Well Wishers of Viola Colony.
- * Dimapur Lirmen Senso; Watsu aser Tamang telungjem.
- * Lirmen Yimten aser Arogo
- * Akumen Yimten aser Arogo
- * Tsuremmen Yimten aser Arogo
- * Wameken, Tzudikong anukapangtem
- * Kijikina Yim 3-4 nungi aser Assam artsu nungi
- * Lirmen Imchen Tebou Semchirtem
- * Shri Imna Along LKR Minister Govt of Nagaland
- * Ano Mayimjemba Tembatinurtem.

Ojala Chimur aser Anukapangtem.

Tamil Nadu-i NEP anemer saka SSA funds bo imlar: Dharmendra Pradhan



Chennai, September 22 (Agencies): Tamil Nadu-i tekong kanga meranga National Education Policy (NEP) agizüksü memelunger, anungji parnoki Centre dang nungi Sarva Shiksha Abhiyan schme kübok senotsü meimlatsüla, ta Hombarnü Union education minister Dharmendra Pradhan-i metetdaksü.

Tamil Nadu nung DMK sorkari kaketshirtem dang nungibo politics tongtibangba kümdaktsür, ta Union Minister-i aitsü.

Union minister-i, India nung nütsüng shilem 10-i dang English oshi jembir, ajisüaka shingaia iba oshi anema menokdaker, ta ashi.

"Nai English angazüktsü kokra kechiba India nunger oshi ka angazüktsü memelunger? DMK-i oshi ana policy benokba ajanga Tamil Nadhu nung tetsübu aitdaksür," ta pai ashi.

Centre sorkari Tamil Nadu nung shisaliok atema sen agütsüba anenogo, ta jembibaji tiyazü, kechiyong Sarva Shiksha Abhiyan dak alaka tanga sechemes atemabo senotsü agütsüdar, ta paisa metetdaksü.

"School mid-day meal scheme atema sen maneni agütsüdar. Adult literacy programme atema-a Tamil Nadu nem sen agütsüdar," ta paisa metetdaksü.

IIT Madras Dakshinapatha Summit nung jembidang Pradhan-i, "Ni Tamil oshi angazükner, kechiyong iba oshi ya tashitait oshi ka lir," ta metetdakja liasü.

"Tesüiba mapangtem nung science, commerce aser humanities nung rangloker dang shisaliok agüja liasü. Tangbo onoki skills nunga rangloker," ta pai metetdaksü.

IIT Madras nung sentong ka nung adenba sülen osangbenertem den jembidang Pradhan-i, "Asen linüki NEP agizükogo, ta ni state nung aiben jembigo aser Parliament nunga jembigo. Anungji asenoki iba sülenji anidaktsüla. Union sorkari agütsüba MoU ji nenoki agizüktsüla. Onoki amalitepa inyaktsü (senotsü agütsütsü) melunga dang lir, ajisüaka ajak longjemer amalitepa inyaktsüla," ta ashi.

Paisa, "Union sorkari state nung oshi ka kangshia benoker masü. Ni ya jangjashitsüner-kaketshirtemi tasembuba oshi ka shimtsüla," ta ashi.



TIR YIMYIM YIMOBILEM (EDITRIAL)

DIMAPUR TUESDAY, SEPTEMBER (RONGJUI) 23, 2025

Nisung tamajunger jenokdak

Punjab kübok Batala yimti nung Cheema Khudi ta ajaba tesem ka nung iba ita tetenzüklen yimten lenir ka tenüing agi Jugraj Singh tepsetba ken o nung temulung melemer bilemer nisung ana Kohima nung hotel ka nung anena lia, Nagaland police teyari agia Punjab police-i apuba nungji Punjab nungertem dang nungibo asenok Nagaland nung alirtem shisatebuluba asütsüsa atalokogo. Atangji, aibelener anema ken o bushisüngdangba inyakyim nung aibelener liaka, obendangdak maitsü tashibo tang amaji nisung tepseter shitakbaji pua liaka, nisung tepseter ta meshitet, kechiyong pai mesüra parnoki nisung tepsetogo ta kuli tejangja bener arua aija mali. Iba jagi Punjab nung nisung tepsetba maparen nung Kohima nung apurtem dangjia tangbo nisung tepseter apu ta masü saka nisung tepsetba mapa nung temulung melemer bilemer nisung ana apu ta dang shiteter. Ajisüaka, tenaji Punjab nungi Kohima tashi arua hotel nung amongbaji raliwalir tajungbo masütsü aser Punjab nungi police-tem arua apuba nungji, tebang agi meshiaka, mapa tulu keta lir. Item nisung tepsetertem ya tetsübutüsü nisungtem lir, kechiyong parnok anishirtem ya India nung masü saka tanga bendang limatem nung alir aser idak nung jagi parnoki tang Kohima nung apurtem ama nemji nüngdak ajak agütsür nisung tepsetba mapatemji inyadaksür. Atangji, nisung tepsetba mapa nung shilem agirtem ajakji Punjab nunger, anungji Punjab lima tensa tiaji jangratemtsükabo masü saka ano kodang Punjab nung nisung tepseter arua Nagaland nung jenokbaji bilemdangdir, Nagaland tensa tiajia Punjab den kecha balaka tajungbabo masü ta asenoki angatetsü. Iba jagi, Nagaland nung yimten ozüing aser yimten inyakyim akangshitsü nüngdaker. Atangji, tang Kohima nung Punjab nunger nisung tepsetba maparen nung apurtem ama mittsü asoshi Nagaland nung tangbo Dimapur nung dena ILP amshitsü ozüing lateta lir, anungji asenoki iba ILP ozüing mapa küma amshitsüba ya government nung alirtemia kanga süoki ia mapa küma inyaksüla aser nübortemia government nung alirtem tashi aser tasü itdakja nungittsüla aser mapang mapang shia government nung alirtem saksalemdaksütsüla. Tanübo Punjab police-temi kanga temulung agüja bushia aruba agi Kohima nung jenoka aliba nisung tepsetertemji putetogo, ajisüaka Punjab nungi policitem-ji maru ka asübo, ashiko, nisung anaji Nagaland nung dokan ka lapoker alitsü sentong atongya liasüba asütsüa akok. Iba amaji pei state nung mapa tamajung inyaker arua Nagaland nung jenoka yur business inyakterema aika alitsü südi ta shisabolua bilemer. Asenoki ILP ozüing aliyonga mapa küma mebenshir aser Dimapur nungbo ozüing latetaka, tang tashibo ILP mamshir. Aji oda, ILP ozüing shitak amshiang ta takangba agüja telok kar longkak ait atar asütsüa akok. Iba ama asen yimten zübazülemba ajanga asen lima ya alima tesem balala nungi ozüing raksartem jenokdak kümdagi. Kohima nunga dena Punjab nung nisung tepseter arua jenoktet nungbo, Dimapur nungbo tesem kwika nungi ozüing raksartem jenoka alitsü ta shisabolua bilemer. Aji oda, Dimapur yimti nung ya nisung tajunga aika lir aser ano tamajunga aika lir, anungji ozüing agi bendangtsüba dak alaka tema tereprangtsübo ajak tajung aser ozüing kübok alirtem amai dang angutsü. Atangji, asen lima nung ozüing raksartem jenoka aliba ya tanga state-tem nungi arubatem dangbo masütsü saka asenok nisungtema aikasa alitsü, kechiyong Dimapur ya ozüing memelaba mozü aser prangbong injang shibelenba tesem tongtibang ka lir, anungji asenok tenük agi menguaka aser asenok mitkartemi meputetaka, anogo shia asen yimti nung item ozüing memelaba osettemji sen crore aika jenjang bener süidagi ta bilemdi. Aji oda, asen lima ya item ama ozüing memelaba mapa inyaktertem aser nisung tepseter adenshidak yimti amato ka küma odaksüra, lia liabo auer ashir, rakzükratemer aser ozüing memelaba oset aser machimajemtsü ayokertem tesep amai ka dang kümadoktsü aser itemji telok telok tenteter, Cowboy film nung ama anogo shia parnok telok o telok na khatepba lima ka dang kümadoktsü. Iba ama lima ka küma aotsübaji, atangji, tanü tashibo asen mulung asütsü.

OLEMSABANG

LAI BUSHIBA: ALIMA NUNG TASHI TULUTIBAJI TAMANG (IBRI 11: 1-40)

~ Rev. Maong Lemtur

(Iba ya DABA Tongtepratep Adok 156, January - July 2024 nung adokba ocet tazüingertem ajangzükdaktsütsü bilema adoktsür).

(Yashi adok nungi...)

3. Noai tamang agi mapa inyak.

"Tamang agi Noai, mangubatem indang tekümdangtsü o Tsüngrem nungi ngua, pai Tsüngrem tsübuja pei kibong kümtettsü asoshi rong renem, aser agi pai alima meimchir aitsü, aser tamang nungi adokba temeshi senmanger aküm" (Ibri 11: 7).

Noa tamang ajanga Tsüngrem nungi tekümdangtsü o angu. Pa tamang ajanga par kibong kümzüktettsüsa rong renem. Iba rong ya sung agi yangluba rong ka dang masü, saka tamang agi Tsüngremi ashiba angaa yangluba rong ka liasü. Noa tamang ajanga par nüburi mamangtetba jungkai adoka aitsü. Noa putu nüburttem ama malitsü indang Lai nung Yisua shia lir (Mati 24: 36- 42). Tamang agi mapa inyakba kuli mezüngbubaji Noa liasü.

Yamaji tamangertemi pei tamangji mapa agi sayutettsü nüngdaker. Naia tamangji mapa agi sayutetdagi ma?

4. Ata-a litetba tamang Tebutitem dak liasü (Ibri 11: 8-22)

"Tamang agi Abraham, kodang pa aja, pa senmangtsü asoshi kechi linük tangutsü liasü, aji agi apusoa aotsü pai tashi anga aser pa koleni aor memeteti pa apusoa ao (t. 8).

Tamang agi pa aener ama tenangzükbaba lima nung amunger küma, iba tenangzükbaba kasa pa senmangertem Isak aser Yakob den süki nung ali (t. 9).

Kechiyong kechi yimti teyangluba aser kisüba Tsüngrem lir, tamendakdak akaba iba yimti asoshi pai ata-a liasü (t.10).

Tamang agi Saraia arishi anogo süitemer külen, nu menden nung metsü mashisa akümtsü tashi angu. Kechiyong shibai nangzük pa dang lai tsüngchir ta züngshi" (t. 11).

Taküm nung ataa alitsüba ya kanga tasak. Saka tamang jagibo Tsüngrem sentong atalokdaksütsü asoshi ata-a liteter ta item Lai tekong ajanga kuli agütsür. Tsüngremi nangzükbaji kodang ataloktsü memetet, saka Isreal Tebutitemi (Abraham, Isak aser Yakob) Tsüngrem tenangzükbaba asoshi tamang agi ataa liasü.

Abraham aser Sarai Tsüngremi nangzükbaba metsü asoshi küm aika ata-a liasü. Kodang tamang kadir iba tamang jagibo ata-a liteter. Ata-a litetba tamangji Isreal tebutitem taküm ajanga sayur. Asen tamangjia ataa litetba tamang asütsü idaki ajungshir. Ne tamang agi ataa liteter asüng meliteter? 5. Raratsü akokba tamang Mosa dak liasü (Ibri 11: 23-29)

"Kodang Mosa aso, tamang agi pa tsüraburi ita asem miima ayu..." (t. 23)

"Tamang agi Mosa tain kümer pai Farao jalar chir ta ajatsü menangzük." (t. 24).

"Ijip rongsen ajak dang nungi Khrista asoshi maksüa ataladaksübbaji rongsen tuluba ta züngshi," (t. 26).

"Tamang agi pai chuba ain adokba metsübu, Ijip lima toktsü. Kechiyong pai shiba mangu, pa dang angu ama aremzüka ali." (t.27).

"Mezüng chirtem samatsübai parnok dak mekongshitsü asoshi, pai tamang agi Kümtettsü Benjong aser azü rükloktsüba maparenji yanglu." (t. 28).


Mosa tamang nungi tongtibang tangazüktsü lesson asem angur: Mosa tamang ajanga Farao jalar chir ta ajatsü menangzük; Ijip rongsen ajak dang nungi Khrista asoshi maksüa ataladaksübbaji rongsen tuluba ta pai züngshi; aser Tamang agi pai chuba ain adokba metsübu, Ijip lima toktsü.

Alima tashi anema Tamang agi takok ngua raraba tatishitsü tuluj Mosa ajanga angazüker. Anungji iba ama tamang tasü tait alima tongbang raratsü asoshi tamanger shia taküm nung nüngdaker. Ne daka alima temenen tongbang raratettsüsa tamang tasü tait lir ma? 6. Takok anguba tamang - Yihusua aser Rahab (Ibri 11: 30- 31)

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kibong ajunga mission inyakba kibong asütsüla: Dr. PC Mathew



All India Congress on Church in Mission (AICOCIM) senden alidang Urban India Ministries tentetsang aser World Evangelical Alliance nung global family challenge director, Dr. P.C. Mathew-i osangbener kar den jembidang tangokba noksa nung angur.

September 22, 2025: Anogo ishika tejaklen All India Congress on Church in Mission (AICOCIM) senden aliba mapang osangbenertem den jurila jembidang Urban India Ministries tentetsang aser World Evangelical Alliance nung Global Family Challenge director, Dr. P.C. Mathew-i, kibongtem nung timtem balala koktettsü atema Arogoi kechi inyaker; iba nungji ajemdaker India nung aliba Arogotem aintsü, ta ashi.

Osangbener den jembidang Dr. Mathew-i, Arogoi evangelism atema inyakba denji külemi kibongtem nung timtem balala mesendoktsüla, ta ashi.

Paisa, nütsüngsübaji kibongtem nungi tenzüksüla; tarutsü putu lanurtem tamang nung tera-yanga lidaktsünüra pastor tem aser lenirtemi kibongtem anepalutsüla, ta ashi.

"Kibong ka indang sayutsüngitsü aser tesayuba agütsütsü atema Tsüngremi asenok nem khuret agüja lir," ta paisa metetdaksü.

Mathew-i pastor ka ama training agiba sülen tamasabo India nung tezülen aliba tesemtem nung missionary inyaknüa liasü, ajisüaka pai par medemer Tsüngrem tenzüker kibongtem nung tebilemtsü khuret balala anguba ajanga pai lenmang tasen ka dang shim.

"Külem tenzükertem aika lanur asüba mapang nungbo tamang jenjang tashi itta liasü, ajisüaka kibong akümba sülenbo kibongtem nung timtem tulu ajangshia liasü. Ibaji ajanga parnok tanela jenajng aser Arogo nung tenzükba jenjang mejungi kongshia liasü. Ibayongji kibongtem dang sayutsüngitsü aser kibong indang tesayuba agütsütsü atema Tsüngremi kü nem khuret agütsü," ta pai metetdaksü.

1998 küm pai Urban India

Ministries tenteta liasü, aser iba mapang nungjagi iba ministry ya linük tesem balala nung kibongtem nem tesayuba agütsüba aser counseling agütsüba sabang ka kümogo.

Paisa, Tsüngrem yimli yangertsü atema tiyongtsüji kibong lir, ta Laishiba ajanga sayur, ta ashi. Mathew-i, kibongtem nung timtem tuluba dang akümba ya Arogotemi ola madokba agi lir, ta ashi.

Arogo aika nung Khristan kibong ka indang tesayuba magütsür, ibayongji talisa Khristan yimsü dangi meyiper kibongtem akhi yimya nung dang alir, ta pai ashi.

"Arogotem aika nung sarasademba, Lai azüngba mesüra Khrista osangtajung lemsatepba ajanga tamang jenjang asadanger. Ajisüaka kinüngbu tajung ka, kinüngtsü tajung ka mesüra tsürabur tajung kaka asütsü atema temelung magütsür. Anungji tang alima nung aliba timtem ajak ya Arogotem nunga lir," ta pai ashi.

"Arogotem aikati kibong telung nung timtem onüktemji nija tebilemtsü mesüra taaktsü ama züngshir, ibayongji Arogoi odiodia iba indangji mejembir mesüra tesayuba magütsür. Ibayongji pastor kibongtem-a aika telung nung azüngmeyaka timtemer," ta pai ashi.

Dr. P.C. Mathew-isa, "Kibong shiaji mission inyakba kibong kaka kümdaktsütsüla. Arogoi kibongtem nung tebilemtsü khuret bentetsütsü atema inyaktsüla aser kibok nung item tebilemtsüji lemsateptsü atema ajungshitsüla," ta ashi.

"Lenirtem aser pastor temi iba tebilemtsü onük ya parnok wadang ka ama agizükra züngsemtemi parnok kija kibong nung timtem balala lemsateptsü. Ibaji taneptsü angutsü atema mezüngbuba mera lir," ta pai ashi.

"Lenir aser pastor

kibongtemi tatishitsü tajung mesayura tangartemi koma anidaktsü?" ta pai asüngdang.

"Pastor tem kibong aika nung timtem khuret jenti lir; lanurtemi tatishitsü tajung manguba agi joki Arogo nung adentsü mejangrar," ta pai ashi.

Paisa pastor tem aser lenirtem dang pei sayutsüngiba amaji taküm lia sayua pei kibong nung akhümtsübutepsü, ajemalutsü aser meimtsü ayongzük.

Mathew-i, "Nütsüngsübaji Tenla kidang dang ataloker masü. Mission ji kibong nungi tenzüksüla. Kibong tebilemtsü sendokra ibaji ajanga Arogo tashi maittsü aser lanurtem pilaa oadoktsü. Arogoi mission kibongtem adokdaksüra ibaji ajanga temelenshi tulu adoktsü," ta metetdaksü.

Mathew-i, "Tanga linüktem den medemdangra India nungbo tanurtem aika kibong maküm tashi tsüraburtem den külemi septeper alir. Kibong züngsem ajak ki ka nung longjema liaka timtem adoker, anungji Laishiba nung ajemdaker tesayuba agütsütsüla," ta ashi.

"Ni aolen ajak ni kibongtem timtem nung aliba angur. Ajisüaka tesüiba küm 20 jakdang den medemdangra Tsüngremi Arogotem asentenshitsüdar. Kodang kibongtem tashi itdir ibaji ajanga Arogo tashi aittsü," ta pai ashi.

Arogoi kibongtem nung rangloker nütsüngsüba mapa inyakra ibaji ajanga tarutsü Arogo jenjang ajungtsü, anungji Arogotemi ochishia alitsü, kibongtem junga alitsü aser tanurtem junga anitetsü atema tsüraburtem nem tesayuba agütsütsüla, ta pai ashi.

"Kibong ajakji mission inyakba kibong akümtsüla. Ibaji ajanga India nung Arogo tashi taitba küma aintsü. Ibaji ajanga Arogo tema-telung ajak aintsü," ta paisa shisem.

ANOGO ABEN TSÜNGREM DEN

Shiba dak mulung alemer ?

Kari talungtsü dak aser kari kor dak temulung ulur. Saka onoki Kibuba ozü Tsüngrem tenüng dak temulung ulur. (T.Ken 20: 7)

Laishibaji tanü asen putu den apeter asü masü? Iba yagi asen tebilemtsü nung yarir asü masü? Nai item ya shisadanger asü masü? Iba tekong yagi Tsüngrem dak temulung ajunga agi amangtsü indang sayur. Tenüngsang ken züluri sama-a aotsüba ali rongsen chichiba tanelaren den medemdanga jembir.

Yangi putu ajak nung ajak, asoshi tapet tangazüktsü ka agütsür. Meimchir nükjidong kechi asütsüla iba indang yangi sayur. Tanü asen mapang nung Yisui teküzmükren ashiba o tem nüngdaka lir, 'nenoki pei asoshi ali nung rongsen terizüng, kechi nung tarürtsü aser sung agi chimar aser aueri rakpoker aser auyar. Saka nenok asoshi kotak nung rongsen rizüngang kechi nung tarürtsü aser sung agi machir'.

Kechiaser kong ne rongsen lir, yangji ne mulunga alitsü (Mt. 6 :19-21). Koba tongtibangba ta bilemer? Ni atema anguba? Mesüra Tsüngremer memelenshiba saka tajung teti aliba? Nai koba shimer?

Ukraine-i Baptist lenir ana nem tetushi agütsü



Baptist World Alliance General Secretary, Elijah Brown (abelen) aser European Baptist Federation General Secretary, Alan Donaldson na medal amer tangokba noksa nung angur.

September 22, 2025: Russia aser Ukraine na tsüngda raraba mapang nung Baptist Arogotemi Ukraine nung timtemertem yariba atema Ukraine Tir, Volodymyr Zelensky-i Baptist lenir ana nem tetushi agütsü.

Tawa sentong ka nung Ukraine Tiri Baptist World Alliance (BWA) nung General Secretary, Elijah Brown aser European Baptist Federation (EBF) General Secretary, Alan Donaldson na nem tetushi agüja 'alima tesem balala nung Ukraine yariba medemertem' ta metetdaksü.

All-Ukrainian Union of Associations of Evangelical Christian-Baptists den senteper BWA aser EBF napronglai rara ajanga kongshirtem nem teyari agüja arudar.

Baptist Arogotemi Ukraine nung nisung million 2 dak tali nem tejenokdak, chiyungtsü, mozü aser medical teyari densema teyari balala agütsüogo.

Ukraine Tiri Baptist World Alliance (BWA) nung General Secretary, Brown nem 'Order of Prince Yaroslav the Wise', 5th Class medal agütsü aser European Baptist Federation (EBF) General Secretary, Alan

nem Order of Merit, 3rd Class medal agütsü.

Iba sempet agizükba sülen Brown-i, "Iba sentong nung densema Baptist World Alliance tenüng nung iba sempet agizükba atema pelar. Ukraine nunger Baptist Khristantemi tongbang tejaklen nokdaker anibelem arema timtemertem tenzükba aser alima tesem balala nung Baptist kibongi maneni nungita yariba mapa tajung reprangteta iba sempet agütsüogo," ta metetdaksü.

"Rara tiyongtsü nung iba sempet agütsüba ajanga maneni ano teinyaktsü mapa aika lir ta nenshia metetdaksür. Ukraine aser alima tesem balala nung yimjung atema asenoki maneni longjemer inyakdi," ta paisa ayongzük.

Baptist lenir ana nem tetushi agütsüba sentong ya Ukraine nunger Independence Day anogomong (August 24) nung agi. Iba sülen anogo ka lir 2nd National Prayer Breakfast among aser iba sentong nungjia Baptist lenir anaprong aden.

Iba sentong nungji bendanger lenirtem 350 densema nisung 1,200 aden.

National Prayer Breakfast sentong nungji Ukraine nunger atema sarasademja liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tezükbangtsü**

(n) jara mesüra sürra ama agi nembanga ayutsü yangluba oset (cover made by leaves or bamboo wall)

* Sürra aser azü agi tezükbangtsü yanglur kilem zükbang.

Tezüknem

(adv) temenemtsü tamajung, teshinem (stink)

* Mozü nung tezüknem menemer.



Tir Yimyim

OLONG PAITEP # 7279

1						2				3
								4		
5		6				7				
8										9
								10		
				11		12				
		13								
14						15				
				16						

TIPLIN

1. O jembitsü tashi - 8
5. Sünjiang tapu ka - 5
7. Tekanük nung enokba - 5
8. Teka amtep - 5
12. Tzüc asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN


1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjiong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7278 TELANGZÜBA**TIPLIN :**

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioktsü, 17. Itsük,
18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüksü, 6. Azübenshi,
8. Lah, 9. Jangkok, 12. Akok,
14. Nashi, 16. Sür.

NAI-A YA METETTER

Saudi Ministry of Human Resources and Social Development-i 95th National Day nung Saudi wako indang mosaic tulutiba yangluogo. Parnoki 600 square meters nung industrial helmets 11,500 tema amshia mosaic ka yanglu aser iba atema Guinness World Record-i "largest flag created through mosaic art" kuli agütsüogo.

Asür Zubeen procession nung gari 2 dang melatsü: CM Sarma

Guwahati, September 22, 2025 (Agencies): Assam

Chief Minister Himanta Biswa Sarma-i September 22, 2025 nü kentener Zubeen Garg indang asüpila sentong atema osang tejangja metetdaksüogo.

Zubeen mang abenba ambulance den pa kinungtsü, kinungertem aser medemertem amenba bus gari tila ka dak alia tanga garitem memelatsü ta Chief Minister Sarma-i ashi.

"Iba dak alia procession piyong nung tanga gari ka danga memelatsü. Airport nungi pa mang kidangi bener aruba

ama iba procession ya tiptema dang agitsü" ta pai ashi.

Cremation ground atongba sülen Assam Police nungi pallbearers-i national highway nungi pa mang meintsü.

Police-i gun salute ka agüja tatembang akhüm agütsütsü aser iba sülen par kibongi aginüba ama putiri tatembang mapa inyaksü ta CM Sarma-i ashi.

Chief Minister-isa security aser traffic inyakyim indang ashidang asüpila sentong agiba anogo Jagiroad tsütsü nungi gari marudaksütsü aser Meghalaya

leni aoba garitembo yoktsü ta ashi.

Jorabat tsütsü nungi aruba garitem ghonda 4-5 shi ka tenokdangba alitsü ta paisa ashi.

Asür Zubeen nem tetushi agüja Assam sorkari tanü aser asüng 'dry days' ta sangdongogo. Meghalaya sorkaria Jorabat nungi aruba lenmang nung aliba wine shops ajak shibangtsü metetdaksüogo.

Zubeen Garg den asüpila sentong ya September 23, 2025 nü Guwahati anasa yimtsüng ka nung agitsü.

**School Readiness:**

Early Childhood Care and Education under ICDS prepares children for formal schooling by developing pre-reading,



pre-reading, pre-writing, and pre-numeracy skills. Helps reduce dropout rates and improves future academic performance.



Nutritional & Health Benefits: Anganwadi centres provide supplementary nutrition, health check-ups and immunization, which go hand in hand with early education. Ensures that children are healthy and ready to learn.

Equity & Inclusion: Provides free access to education and care for children from marginalised and economically weaker sections. Helps bridge the gap between privileged and underprivileged children at the start of schooling.

Support for Working Mothers: Anganwadi centres offer a safe and stimulating environment, enabling mothers (especially from low income families) to work without worrying about children about childcare

Community Participation: Involves parents, caregivers and the community in child development, spreading awareness about health, hygiene and education.



Long-term Impact on society: Studies show that investment in ECCE leads to better educational outcomes, higher productivity and reduced social inequalities in the long run.

A convergence of nutrition and foundational education at the



ICDS Anganwadi level.

POSHAN Abhiyaan
PM's Overarching Scheme for Holistic Nourishment



सही पोषण - देश रोशन



Register your child in the POSHAN Tracker App by visiting your nearest Anganwadi center today.

Denuclearisation akhangba anenra US den sensaksemtsü mulunga lir: Kim



Pyongyang, Rongjui/September 22 (Agencies):

North Korea lenir Kim Jong Un-i, Washington-i nuclear weapon tem toktsütsü atema par linük nongshiba anenra US den sensaksemtsü atema pa renema lir ta shiogo.

"United States-i onok denuclearize sütsütsü atema tejangraba aliba tokja chichiba yimjung nung linüra United States den mener sensak asemtsü atema kechi kuli agi onok nokdangtsü," ta Kim-i Pyongyang nung Deobarnü Supreme People's Assembly nung o jembiba mapang ashi, ta official Korean Central News Agency (KCNA)-i metetdaksü.

North Korea lenir yagisa, US tir Donald Trump tenüngsanga jembi, shiba den pai taoba mapang asemben tashi ajurutepba senden menogo. "Ni US tir Trump den ajurutepa senden amenba tang tashi pela bilemteter," ta pai ashi.

Toba ita White House nung senden amenba mapang Trump aser South Korea lenir Lee Jae-myung napronglai North Korea lenir den ya ajuruteptsü asoshi mulunga aliba lemsatepba sülen Kim-i tang iba olen ya lemastepogo.

"Künübo ni pa den ajuruteptsü. Pa den ajuruteptsü yongya atar. Pai küdang junga benshiogo," ta Trump-i iba mapang ashiba den, tenu dak alaka Kim ya pai ajak dang nungi tajungba meteta lir ta shisem.

Lee, shibai taoba küm June ita office mapa agizükba sülen kidanger linük den tesendaktep yanglushinüba lemsatepa arudar, pai kasa senden nung ashiba agi, US tir Trump-i North Korea nung Trump Tower ka yanglutsü imlar, ajita asünung dang pa-a idakji golf asayettsü.

Lee aser Trump nati tensedaktep yanglushitsü tejangraba aliba lemsatepaka, US aser South Korea na longjemer military drill tem ayongzüka agiba ya North Korea-i aija arudar, aser Kim adianu Kim Yo Jong-i item military drill tem ya parnok

amaktsü atema renemshiba ka lir ta shiogo.

Tawa BBC aser Reuters news agency den sensakseмба mapang Lee-i, North Korea indang nuclear weapon dak sendakba nung par linük tamendakdak sensaksemtsü atema mulunga aliba lemsatepogo. Deobarnü BBC den sensakseмба mapang Lee-i ashiba agi, North Korea nem tang parnok ket nung aliba hadirtem toktsüdaksütsü atema amajok nung merandangtsü melen a parnok nem nuclear weapon talila meyangludaksütsü atema-ang sensaksemtsü mulunga lir.

Kasa mapang nung Reuters den sensakseмба mapang Lee-i, tenokdangba balala agütsüba ajanga Pyongyang sota meyutet aser parnoki küm nung nuclear weapon 15 nungi 20 tashi bendenloka arudar, ta ashi.

"Taoba mapang tenokdangba balala agütsüba aser parnok nongshiba ajanga tebilemtsütem mebentet, saka iba ajanga tamajungba kümdaktsü," ta Lee-i ashi.

Deobarnü Supreme People's Assembly nung o jembiba mapang Kim-i ashiba agi, tenokdangba balala agütsüba ajanga linük tashi taitba kümdaktsüogo. Ajisüaka North Korea nung nütsüng yongsük million 26 ya küm aika chiyongtsü agi kanga anünga arudar.

"Ali mama tashi tenokdangba balala agindaktsütsü melen a langka melenteptsü asoshi kodanga sensak masemtsü," ta Kim-i ashi.

Tenokdangba agütsür aliba manga North Korea-i nuclear weapons and ballistic missile programme tem maneni tejakdangi bener aruba ajanga United Nations-i iba linük nem tenokdangba balala agütsür lir.

Ajisüaka Kim Jong Un-i taoba küm, tsükchirtem nungi kümzüka ayutsü atema linük nuclear arsenal jenjang ajungketshitsü ta tenangzüka agütsüogo.

Stockholm International

Peace Research Institute's (SIPRI) Yearbook-i parnok indang annual report nung nuclear aliba linük teku; China, France, Israel, India, North Korea, Pakistan, Russia, United Kingdom aser US yongtsü nung arms race tasen ka tenzüktsü alima lendongbang nung lir ta tekümdangtsü metetdaksüogo

Iba ita tetenzüklen China lenir Xi Jinping, aser Russia lenir Vladimir Putin na den Beijing nung ajurutepba sülen Kim-i tang Washington den sensaksemtsü atema mulunga aliba lemsatepogo. World War II tembangba sülen küm 80 ajungba nüngdem nung military parade ka ayongzüka agiba nung Kim-i shilem agia liasü.

Iba mapang Trump-i pa indang Truth Social sabang ajanga, "nenok United States of America anema tasa balala asaba mapang Vladimir Putin, aser Kim Jong Un na dena salem lemsatepang," ta Xi dang ashi.

SÜR KÜM 12 AJUNGBA MENUNGRA BILEMTETER



23.09.2013 - 23.09.2025

Kodanga amatetba ozü temeim Obala, **MARBENBA PONGEN** (Chuchuyimlang), ne mapa tajungtem onok molung nung teti rizünga lir aser ne temeim mapatem teti menungra bilemteter. Onok molungjang nung na teti dena lir.

~Temeim Kinungtsü, Chirnurtem aser Semchirtem.

Mount Moriah School, Ungma VACANCY

Vacancy	Minimum Qualification	Salary
Headmaster	M.A. B.Ed	Rs. 32,000 +
Graduate Teacher (Science)	B.Sc. B.Ed	Rs.23,000 +
Under Graduate Teacher	B.A.D.El.Ed	Rs.18,000 +

Interested persons may submit the relevant documents to the school office on or before 22nd October 2025.

Sd/-
Headmaster
9862428929

Khyber Pakhtunkhwa amakba nung asürtem temang Corps Commander kima ayutsü

Islamabad, Rongjui/Sept. 22 (Agencies): Tirah Valley nung tai maket civilian tem tepsetba anema Hombarnü Khyber Chowk nung mener long aitba liasü aser ano Peshawar nunga iba ama sentong sangdongtsü akok. Tirah nung aliba Akakhel kin temi tetsür tasü mang aremtsü saka tebur aser tanurtem tasü mang ya Corps Commander House jakdang ayutsü telemtetba agi, ta osang ajanga ashir.

Khyber Pakhtunkhwa aser anasa aliba district tem nung Tehrik-e-Taliban Pakistan (TTP) jenoka aliba tesem nung tenük yoker Pakistan-i tayimtsü amshia amak aser counter-terror operations agia liasü.

Deobarnep 2:00 ako meta Pakistan fighter jets temi Tirah Valley nung aliba Matre Dara yimtsüng nung LS-6 bomb ti tsükdaktsü, kong civilian 30 shi asü.

Pakistan northwest tsütsü telungpuri lendong agütsüba tenüng TTP-i agiba tali akumba nung langzüa Islamabad-i mera agiba nung shilem ka ama iba yimtsüng ya amak.

Tawa yamaji operation ka agiba mapang Khyber Pakhtunkhwa nung Bannu aser Laki Marwat district tem nung am mang agi sangwa kuma amakdang telungpur 31 tepset ta Pakistan-i ashir.

Iba region nung drones amshia amakba aser air/

detection operations nung mangatettep lia arur. Tatishitsü agi, taküm March ita Katlang (Mardan District, KP) nung mitkari telungpur dak amakba nung civilian asüba liasü. Kasaji May ita nunga Hurmuz village, North Waziristan (KP) nung drone ka amshia amakba nung tanur pezü tepset aser kar yirutsü.

Khyber Pakhtunkhwa ya Pakistan northwest tsütsü Afghanistan den arütsüa lir aser yangji Pashtun nunger timba lir.

Iba province tasazük ya 1,01,741 square kilometers lir aser nisung crore pezü shi alir. Yangji nütsüng yongsük shilem 75-80 shi Pashtuns nunger lir aser ano Hindok, Chitrali aser Kohistani ama kin tilatema alir.

France-i Palestine linük agizüktsü

Paris, Rongjui/Sept. 22 (Agencies): Danga European linük temi bhukuma France Tir Emmanuel Macron-i Hombarnü New York nung Palestine linük ka agizüktsü.

UK, Canada aser Australia linük temi telemtetba agia aliba ama Macron-ia iba mera ya nisung ajak asoshi political process, yimjung aser security sentong tetenzüker asütsü ta ashi.

UK ama France ya diplomatic tsütsü kanga taret lir, kechiaser linük anaprong ya UN Security Council aser G7 nung permanent member lir aser tan hopta UN General Assembly alitsü lia Saudi Arabia den angatettepa inyaker.

Paris den G7 nungi European linük tulu ana, Germany aser Italy den US-a madentsü.

Israel-i iba mera ya Hamas

asoshi sempet lir ta aitsür aser par UN ambassador-i Hombarnü iba temelenshi ya "circus" ka lir ta ashi.

Ato Kilonser Benjamin Netanyahu-i River Jordan anüolen Palestine nunger linük malitsü ta ashir, aser Tir Isaac Herzog-ia yamaji linük ka agizükba ajanga "ammang" sepai temulung ulutsü ta ashi.

Linük tila Andorra aser San Marino den külemi Belgium, Luxembourg aser Malta linüktemia Palestine linük agizükba sangdongtsü, ta Paris-i ashir.

Portugal-ia Deobar aonung sangdongogo.

Taoba küm Europe nungi Spain aser Norway densema linük aikati Palestine linük ya agizüka lir.

Macron-i iba sangdong agütsütsü lia Deobar aonung Eiffel Tower nung Palestine

aser Israel nunger nisan sayua liasü.

Italy nunga tesem balala nung Palestine nunger bhukuma longkak aita liasü, kong Giorgia Meloni sorkari tawa ang maliba linük ka agizükba ajanga taginüba ama masütsü ta ashi.

Germany nung sorkari Palestine linük atema tangbo mejembitsü ta ashir, aser Foreign Minister Johann Wadephul Hombarnep New York-i aodang, Germany asoshiho Palestine linük ka agizüktsü ya inyakyim tatem nung asütsü ta ashi. "Ajisüaka inyakyim ya tang tenzüktsüla," ta ashi.

Europe nungi Germany ya Israel tembar tajungtiba rongnung ka süaka, Israel mitkari Gaza nung telangzüba agütsüba asoshi Germany Chancellor Friedrich Merz mepelai akumer.

NSF MM Trophy: PLLA Manipur aser Mao SU nati takok nguogo



Kohima, Rongjui/September 22 (TYO): Indira Ganddhi Stadium Kohima nung tang asaya aliba 25buba NSF Martyrs' Memorial Trophy 2025 nung Hombarnü PLLA Manipur aser Mao Students' Union nati pei tata asaya kokogo.

Iba asayamung ya Naga Students' Federation (NSF) aser Angami Students' Union (ASU) na longjemer ayongzüka asayadar.

Hombarnü mezüngbuba asaya nung PLLA Manipur-i goal 14-1 agi Don Bosco SA ayong ayonga kokogo.

Asaya nung mezüngbuba goal ya PLLA Manipur atema

Hemgoulal-i idaktsü aser iba sülen paisa ano goal asem idakja liasü. Maneni Nohminlen, Joyful, Ngamkholal, Jangminlal aser Ngamminlal nungeri tanungba goal tem idakja liasü.

Don Bosco S. A atema goal ka ya Niamchuilung-i idakja liasü.

Iba asaya atema player of the match naroküm PLLA Manipur nungi asayar Jangminlal nem taoba mapang NSF Executive aser Mao Union Kohima tir E. Krelo-i agüja liasü.

Tanabuba asaya nung Mao Students' Union-i Meriema Youth Organisation goal 5-1 agi koka liasü.

Mao Students' Union atema Lamminthang-i goal asem idaktsü aser tanungba goal ana ya W. John-i idaktsü.

Asaya nung Meriema Youth Organisation nungi asayar Lalgamba-ia goal ka idaktsü.

Player of the match Lohrii Kaisii nem taoba mapang All Nagaland College Students Union tir Vilhousielie Kengurüse-i naroküm agüja liasü.

September 23 nü asaya:

Venue: Chumoukedima Football Stadium.

Sechü Zubza Football Academy vs Football 4 Change (F4C) Manipur @ 5pm.

Sultan of Johor Cup atema India team sangdongogo

Rongjui/September 22, 2025 (Agencies): Hockey India-i Hombarnü sangdong ka ajanga Sultan of Johor Cup atema Indian junior men's hockey team nung asayar 18 tenüng sangdongogo.

Iba asayamung ya Malaysia nung October ita asayatsü aser team captain asütsü atema Defender Rohit shimba sangdongogo.

India junior men's hockey team coach, PR Sreejesh-i ashiba agi, "Sultan of Johor Cup atema team kanga junga renemogo. Onok team tajung lir aser Junior World Cup tonga arudar asünung iba asayamung ya asayartem team tashitaittem den asaya-a tendangsü aser international jenjang nung tajangshiba angutsü atema tongtibang asütsü. Malaysia nung takok tashi junga asayatsü atema onok yokgya atadar."

Taoba mapang iba asayamung nung India team-i bronze medal ngur lir aser iba dak ajemdaker taküma junga asayatsü merangsü.

Iba asayamung nung parnok mezüngbuba asaya October 11 nü Great Britain den asayatsü aser iba sülen October 12 nü

New Zealand den asayatsü. Maneni parnok October 14 nü Pakistan den asayatsü aser October 15 nü Australia den asayatsü. Round-robin stage nung tatembangbuba asaya Malaysia den October 17 nü asayatsü.

Round-robin stage tembanga asayaba sülen temaba jenjang nung tembanga team ana October 18 nü final asayatsü.

Sultan of Johor Cup atema India Squad:

Goalkeepers:

Bikramjit Singh, Princedeeep Singh

Defenders:

Rohit (C), Talem Priyobarta, Anmol Ekka, Amir Ali, Sunil P B, Ravneet Singh

Midfielders:

Ankit Pal, Thounaojam Ingalemba Luwang, Adrohit Ekka, Araiheet Singh Hundal, Rosan Kujur, Manmeet Singh

Forwards:

Arshdeep Singh, Sourabh Anand Kushwaha, Ajeet Yadav, Gurjot Singh.

Standby :

Vivek Lakra, Shardanand Tiwari, Thockchom Kingson Singh, Rohit Kullu aserDilraj Singh.

Quinton de Kock ODI nung tanaben asayashi tenzüksü



Rongjui/September 22, 2025 (Agencies): South Africa nunger nüngtugu cricket asayar Quinton de Kock shiba asaya nungi anener liasü, pa tanaben meyipa arua Pakistan den T20I aser ODI naprongla nung asayatsü atema team nung züngoksemogo.

Arishi küm 32 tain wicketkeeper-batter shiba ICC Men's World Cup 2023 sülen ODI asaya nungi anena liasü, pa Barbados nung India den T20 World Cup 2024 final sülen tang mezüngbuba T20I team nunga denogo.

South Africa team Pakistan nung oa format ajak asayatsü renemba mapang De Kock team nung züngoksemogo. Iba asayamung ya Lahore aser Rawalpindi na nung October 12 nungi 24 tashi nung Test ana

asaya-a tenzüksü. Test captain Temba Bavuma yiruba ajanga team nung mali aser pa maliba mapang team ya Aiden Markram lenisüba nung asayatsü.

De Kock-i tanaben meyipa arua asayatsü atema telemetba agiba ajanga pa Proteas tenüng nung maneni asayatsü tejangraba aliba sayur. "Pa tarutsü indang taoba inta sensaksem dang pai linük tenüng nungi maneni asayatsü tejangraba aliba jangja aküm," ta South Africa head coach Shukri Conrad-i ashi. "Pai team nem koda teyari agütsütsü aji ajaki meteta lir, aser pa adenba ajanga team tajangzüik dang ajangzüksü."

South Africa squad:

Test squad vs Pakistan: Aiden Markram (captain),

David Bedingham, Corbin Bosch, Dewald Brevis, Tony de Zorzi, Zubayr Hamza, Simon Harmer, Marco Jansen, Keshav Maharaj* (second Test only), Wiaan Mulder, Senuran Muthusamy, Kagiso Rabada, Ryan Rickelton, Tristan Stubbs, Prenelan Subrayen, Kyle Verreynne

ODI squad vs Pakistan:

Matthew Breetzke (captain), Corbin Bosch, Dewald Brevis, Nandre Burger, Gerald Coetzee, Quinton de Kock, Tony de Zorzi, Donovan Ferreira, Bjorn Fortuin, George Linde, Kwena Maphaka, Lungi Ngidi, Nqaba Peter, Lhuan-dré Pretorius, Sinethemba Qeshile

T20I squad vs Pakistan:

David Miller (captain), Quinton de Kock, Nandre Burger, Gerald Coetzee, Bjorn Fortuin, Reeza Hendricks, Rubin Hermann, Kwena Maphaka, Rivaldo Moonsamy, Nqaba Peter, Lhuan-dré Pretorius, Andile Simelane, Jason Smith, Lizaad Williams.

Maneni Namibia den T20I asayamung atema squad:

Donovan Ferreira (captain), Quinton de Kock, Nandre Burger, Gerald Coetzee, Bjorn Fortuin, Reeza Hendricks, Rubin Hermann, Kwena Maphaka, Rivaldo Moonsamy, Nqaba Peter, Lhuan-dré Pretorius, Andile Simelane, Jason Smith, Lizaad Williams.

Team World-i Laver Cup Title tasembuba benogo

Rongjui/September 22, 2025 (Agencies): Deobarnü San Francisco nung America nunger tennis asayar Taylor Fritz-i Team Europe nungi asayar Alexander Zverev 6-3 7-6 (7-4) agi straight sets nung koka Team World-i Laver Cup tasembenbuba akokba nung teyari agütsüogo. Asayamung tepeyong Fritz-i kanga junga asayaogo.

Fritz-i mezüngbuba match point anguba mapang backhand volley winner ka zükokja Team World-i 15-9 agi Europe team akokba nung teyari agüja liasü. Iba asaya akokba sülen Team World captain Andre Agassi-i anir asayartem kanga pelatepa liasü.

Mezüngbuba set nung Fritz-i asaya kanga timtem mesüi 6-3 agi kokatok. Ajisüaka tanabuba set nungbo Zverev-ia asendenshir kanga junga asaya. Zverev break ka agi tesülen sür 4-3 liasü, saka iba sülen pai Fritz indang serve ka break süa kasasa aküm.

Ajisüaka tanabuba set tiebreak nung Fritz-i tatembangbuba point anguba sülen par teammate temi pa

longbang aser benjungtep tenzüka liasü. Roger Federer-ia stand nungi teka ma-a parnok takok asoshi tenüngsang agütsüba nguogo.

Zverev-i serve ka break asüba sülen 4-4 aküm. Iba sülen asayar anapronglai kanga junga asaya tua tiebreaker asayatsüsa aküm.

Tiebreaker asayaba mapang Fritz 3-0 agi tejakdang liasü saka Zverev-i point asem atonga ngua tena kasasa aküm, ajisüaka iba sülen point pongu nungi Fritz-i pezü ngua pai asaya koka liasü.

Alcaraz, shibai taküm US Open nung Grand Slam trokbuba kokogo, pai Argentina nunger asayar Francisco Cerundolo 6-2, 6-1 agi koka Europe team nem parnok title defend asütsü asoshi timla agüja liasü.

Alcaraz aser Casper Ruud natisa Deobarnü mezüngbuba asaya nung 7-6 (7/4), 6-1 agi Reilly Opelka aser Alex Michelsen na koka Team Europe nem timla agütsü, saka tanungba asayartemi junga masayateti taküm iba asayamung Team world nem kokdaksüogo.

BILEMDANGANG
"O tashi angatetertemi kümdanga jembishiner."